

Mīlētēms ēr ont akmēnio gerā?..

Sosēžanējē vēnuo suoduo gēmē ēr augē, vēinamē būrie „vuokīti“ mušē“, jaunē žmuonis. Abodo klēinē, aukštē kāp vēinē lēipas... Abodo svēkē, no pat maža pri darba pripratintē... Tik gīvenk i džiaugēs. Vo, je dā vēns ontram nosēlēstē muokies ēr so šnapšēlē negēntinsēs... Kāp saka golbēs pēina, meškuos taukū betrūks.

Vo dabā... Kāp kuoks šašoulietis prišās atsēstuojē baisē biednīstē. Kou jau berokoutē aple žemē a piningus, ka ni ijētēis netoriejē kor. Vēina laimē, ka gaspaduorios, pas kurin dēina ēš dēinuos aboda „lopa“, nebova bedūšninks... Bet ēr ta škiūnelē, kor šviežē apsēžanējosējē apsēstuojē, bova tuoki pat klēbonti, kāp i vierējēms prasēgīventē.

Sovēnčiavuotē, lig graba lēntuos karto vargtē Pondēivou i sau prižadie jē jaunējē parsēdongēna po viejē nodraskīto stuogo. Kuoks jau tēn tas naodoms dongēnēmuos... Ne bieliznas, ne luovas, ne krasēs, ne torielku... Omžēnatēlsi jaunuos babas kraitē skrīnē i vēlnuonē – vēsos dēdelio darbo pelnīts torts. Atsisieda „gaspadorē“ ont žemēs, atsēriemē i sēina ēr sied, vēns ontra apkabēnēi, kāp do paukštelē. Darbā nespaudē. Tik rūpesnē. Akis i tuolībēs noklīdosēs. Vo mintis, vēina ož kēta keistesnēs... Tik sok, tik sok jaunas, lig šiuo laika vēn aple savi mēslējosēs galvelēs.

Bet pro ožtraškanuojosius longelius ikiūtēna čiemarga mēgla. Artēnuos naktēs. Galva pradiejē ūžtēnā ūžtē. I ronkas, ruoduos, kerus sklaidiosēs, prašies atēlsē. Ožsēsklēndosio ont zuovastēs bekībontēs doralēs žanuotējē sogolē. Ne, ne asluo. Šēp tēp ēsētāisē ont vingiu vingēs išraitīta, matītē, baguotā mergā padērbinta skrīnē. Nuors patarlie skelb, ka mīlētēms ēr ont akmēnio vēitas ožtenk, ont diežē do netelpa. Vēlnuonēs abodom apsēkluotē neožteka... Vo tuo tarpo, kāp tīčiuoms, prakiorēs stuogs tērpstontio snēigo ašaruotēis pradiejē...

– Jergau, jergau... Ar ēlgā vedo tēp vargsiau?.. – i lobas veiziedams aimanava jaunasis. – Kētē nuors atgoltē kamē tor...

– Kuo če zīzi, jug nie tēp prastā. Vedo, ka ēr toštē, bet kraitēnē, dar i vēlnuonē toriau... Kētē ni tēik netor, – trumpā, drūktā ištarē gaspadēnē.

Vo kažkame tuolēi, suoduos pašalie, gerklē paleida onkstīvs gaidīs.